



Hubungan Malaysia-Arab Saudi terus diperkuuh demi keamanan sejagat

Oleh Noor Atiqah Sulaiman - Oktober 23, 2023 @ 8:31pm
nooratiqah.sulaiman@bh.com.my

KUALA LUMPUR: Perdana Menteri berharap hubungan dua hala antara Malaysia dan Arab Saudi akan terus diperkuuh demi kesejahteraan dan keamanan sejagat.

Datuk Seri Anwar Ibrahim berkata, hubungan Malaysia dan Arab Saudi akan melangkaui tingkat baharu dan mencorak lembaran yang segar dalam hubungan persahabatan kedua-dua negara.

Anwar berkata demikian dalam Facebooknya yang berkongsi mengenai pertemuannya dengan Putera Mahkota yang juga Perdana Menteri Arab Saudi, Putera Mohammed Salman, di Istana Al-Yamamah, Sabtu lalu.

Pertemuan rasmi itu adalah atas jemputan peribadi baginda kepada Anwar, selepas Arab Saudi menjadi tuan rumah Sidang Kemuncak Pertama ASEAN-Majlis Kerjasama Teluk (GCC) di ibu negara.

Dalam pertemuan berkenaan, Anwar turut membincangkan perang Palestin dan Israel yang sehingga kini masih berlanjutan sejak 7 Oktober lalu.